

南
北
史
合
注

欽定四庫全書

南北史合注卷一百八十三

明 李清 撰

列傳第八十五

北史九十七

僭偽

夏

赫連氏

燕

慕容氏

後秦

姚氏

北燕

馮氏

西秦

乞伏氏

北涼

沮渠氏

欽定四庫全書

卷一百八十三

題借偽

晉自永嘉之亂寓縣瓜分胡羯憑陵積有年代各言膺
運咸居大寶竟而自相吞滅終為魏臣然魏自昭成以
前王迹未顯劉石之徒時代不接舊書為傳編之四夷
有欺耳目無益緼素且于時五馬浮江正朔未改陽秋
記注具存紀錄雖朝政叢脞而年代已多太宗文皇帝
爰動天文大存刊勒其時事相接已編之載記今斷自
道武已來所吞併者序其行事紀其滅亡餘不相關涉

皆所不取至晉宋齊梁雖曰偏據年漸三百鼎命相承
魏書命曰島夷列之於所不取故不入

鐵弗劉虎南單于苗裔左賢王去卑孫北部帥劉猛從
子居於新興虎意之北北人謂胡父為鮮卑母為鐵弗
因以號為姓虎父詰升爰代領部落升爰死虎代虎死
子務桓代領部落與魏和通務桓死弟閼陁頭代密謀
反叛後務桓子悉勿祈逐閼陁頭而立悉勿祈死弟衛
辰代衛辰務桓第三子既立遣子朝獻昭成妻以女衛

金史卷一百一十五 列傳第二十五
衛辰潛通秦王符堅堅以為左賢王遣使請堅求田地春
去秋來堅許之後背堅專心歸魏舉兵寇堅堅遣其將
鄧羗討擒之堅自至朔方以衛辰為夏陽公統其部落
衛辰復附於堅昭成討破之遂走奔堅堅送還朔方遣
兵代戍昭成末衛辰導堅寇魏南境王師敗績堅遂分
國人為二部自河以西屬衛辰自河以東屬劉庫仁堅
後以衛辰為單于督攝河西雜類屯代來城慕容永據
長子拜衛辰使持節都督河西諸軍事大將軍朔州牧

朔方王姚萇亦遣使結好拜衛辰使持節都督北朔雜
夷諸軍事大將軍大單于河西王幽州牧登國中衛辰
遣子直力鞬冠南部衆八九萬道武軍僅五六千人為
所圍帝乃以車為方營並戰並前大破之於鐵岐山南
直力鞬車騎走帝乘勝追之自五原金津南渡河徑入
其國遂至衛辰所居悅政城衛辰父子驚遁乃分遣陳
留公虔南至白鹽池鹵衛辰家屬將軍伊謂至木根山
擒直力鞬衛辰車騎遁為部下所殺傳首行宮先是河

水赤如血衛辰惡之及衛辰亡誅其族類並投於河

資治通鑑曰誅其子弟宗黨五千餘人噫他年高

洋殺道武後七百餘人亦投於河矣

衛辰第三子勃勃奔薛于部帥太悉伏明元改勃勃名曰屈丐北方言屈丐者卑下也太悉伏送之姚興興高平公破多羅沒奕干妻以女

魏內入諸姓有破多羅氏孝文改潘氏即此

勃勃身長八尺五寸興見而奇之拜驍騎將軍加奉車

都尉常參軍國大議寵踰勲舊與弟濟南公邕曰勃勃
天性不仁難以親育寵之太甚臣竊惑之興曰勃勃有
濟世才吾方收其藝用與共平天下何不可乃以為安
遠將軍封陽川侯使助沒奕干鎮高平邕固諫不可興
乃止以勃勃為持節安北將軍五原公配以三交五部
鮮卑二萬餘落鎮朔方道武末勃勃襲殺奕干并其衆
僭稱大夏天王號年龍昇置百官興乃悔之勃勃恥姓
鐵弗改為赫連氏自謂徽赫與天連又號其支庶為鐵

伐謂族剛如鐵皆堪伐人宋武帝以晉將攻長安勃勃聞而喜曰姚泓豈能拒裕裕必克之待裕去後吾取之如拾遺耳於是秣馬勵兵休養士卒及宋武擒泓留子義真守長安勃勃伐之破義真積人頭為京觀號髑髏臺遂僭稱皇帝於灊上號年昌武定都統萬勒銘城南頌其功德以長安為南郡性驕虐視民如草蒸土築城鐵錐刺入一寸即殺作者并築之所造兵器匠呈必死射甲不入即斬弓人如其入便斬鎧匠凡工匠數千人

常居城上置弓劍于側有所嫌忿手自殺之羣臣忤視者鑿其目笑者決其脣諫者謂之誹謗先截其舌而後斬之議廢其子瑣瑣自長安起兵攻勃勃勃勃遣子太原公昌破瑣殺之以昌為太子始光二年勃勃卒昌僭立昌一名折勃勃第二子既僭位改元承光太武聞勃勃死諸子相攻關中大亂於是西伐乃以輕騎一萬八千濟河襲昌時冬至日昌宴饗王師奄到上下驚擾駕次黑水去其城三十餘里昌乃出戰太武馳往擊之昌

退走入城未閉門軍士乘勝入其西宮焚其西門夜宿
城北明日分軍四出徒萬餘家而還後昌遣弟定與司
空奚斤相持於長安太武乘虛西伐濟君子津以輕騎
三萬倍道兼行羣臣咸諫曰統萬城堅非一日可拔今
輕軍討之進不可克退無所資不若步軍攻具一時俱
往帝曰用兵之術攻城最下不得已而用之如攻具一
時俱往彼必惧而堅守若攻不時拔食盡兵疲外無所
掠非上策也朕以輕騎至城下彼先聞有步軍而徒見

騎至必當心閑朕且羸師誘之若得一戰擒之必矣所以然者軍士去家二千里後有黃河之難所謂置之死地而後生也決戰有餘攻城不足遂行次黑水分軍伏於深谷以少衆至城下昌將狄子玉來降言昌使人追其弟定定曰城堅峻未可攻拔持擒斤等徐往內外擊之有何不濟昌以為然太武惡之退軍城北示昌以弱遣永昌王健及娥清等分騎五千西掠居人會軍士負罪亡入昌城言官軍糧盡士卒食菜輜重在後步兵未

至擊之為便昌信其言引衆出城步騎三萬司徒長孫
翰等咸言昌步陣難陷宜避其鋒且待步兵一時奮擊
帝曰不然遠來求賊恐其不出今避而不擊彼奮我弱
非計也遂收軍偽北引而疲之昌以為退鼓譟而前舒
陣為翼行五六里帝衝之賊陣不動稍前行會有風起
方術官趙倪勸帝更待後日崔浩叱之帝乃分騎為左
右倚之帝墜馬賊逼帝騰馬刺殺其尚書斛黎文又殺
騎賊十餘人流矢中帝帝奮擊不輟昌軍大潰不及入

城奔上却遂克其城初勃勃性奢好治宮室城高十仞
基厚三十步上廣十步宮牆五仞堅可礪刀斧臺榭高
大飛閣相連皆彫鏤圖畫被以綺繡飾以丹青窮極文
采帝謂左右曰葦爾小國用人如此欲不亡得乎侍御
史安頡擒昌帝使侍中古弼迎昌至京舍之西宮門內
給以乘與之副又詔昌尚始平公主假會稽公封秦王
宋書索鹵傳曰燾嘗使昌侍左右與單馬逐鹿深入
山澗昌素有勇名諸將咸謂其不可近燾曰天命有

坐叛走格殺昌弟定小字直犢勃勃第五子凶暴無賴

昌敗定奔平涼自稱尊號改年勝光定登陰槃山望其
本國泣曰先帝以朕承大業者豈有今日事乎使天假
朕年當與卿諸人建季興之業俄羣狐百數鳴于側定
命射之無獲惡之曰所見亦大不臧吐吐天道復何言
哉定與宋連和遙分河北自恒山以東屬宋恒山以西
屬定太武親率輕騎襲平涼定救平涼方陣自固帝四

面圍之斷其水草定不得水引衆下原詔武衛將軍丘
眷擊之定衆潰被創單騎遁收其餘衆西保上邽神麴
四年為吐谷渾慕容瓚所襲擒定送京師被殺

西燕慕容永慕容廆弟暉孫廆據遼東稱燕王傳子皝
皝傳僞稱帝于鄴僞卒子暉立暉既為秦苻堅所并永
徙長安家貧夫妻常賣鞞于市及堅敗于晉慕容冲乃
自稱尊號以永為小將冲攻堅堅出如五將山冲入長
安以慕容垂威名夙著跨據山東憚不敢進衆咸怨之

登國元年冲左將軍韓延因民之怨殺冲立冲將段隨
為燕王改年昌平冲入長安王嘉謂之曰鳳皇鳳皇何
不高飛還故鄉無故在此取滅亡冲敗其左僕射慕容
恒與永潛謀襲殺隨立宜都王子覲為燕王號年建明
率鮮卑男女三十餘萬口乘輿服御禮樂器物去長安
而東以永為武衛將軍恒弟護軍將軍韜陰有貳志誘
覲殺之臨晉恒怒去之永與武衛將軍刁雲率眾攻韜
韜遣司馬宿勤黎逆戰永執戮之韜惧出奔恒營恒立

慕容冲子望為帝改年建平衆悉去望奔永永執望殺之立慕容泓子忠為帝改年建武忠以永為太尉守尚書令封河東公東至聞喜知慕容垂稱尊號託以農要弗進築燕熙城自固刁雲等又殺忠推永為大都督大將軍大單于雍梁秦涼四州牧河東王稱藩於垂後永進據長子僭稱帝號年中興與垂絕垂攻丁零翟釗於滑臺釗敗降永永以釗為車騎大將軍東郡王歲餘謀殺永永誅之垂來攻永

欽定四庫全書

卷一百八十三

十六國春秋曰永告急道武道武遣陳留公虔將軍
庾岳率騎五萬東渡河救之岳等未至而永部下大
逸豆歸等已開門納垂兵 愚按若此一段則永與
魏無涉其傳可削矣今補之

永敗為前驅所獲垂數而戮之并斬永公卿已下刁雲
大逸豆歸等四十餘人

後燕慕容垂字道明晃第五子甚見寵愛常目謂諸弟
曰此兒闊達好奇終能破人家或能成人家故名霸字

道業思遇踰僞僞弗能平及即王位以垂墜焉傷齒改
名缺外名慕卻缺內實惡之尋以讖記之文乃去夫以
垂為名年十三為偏將所在征伐勇冠三軍僞平中原
垂為前鋒累戰有大功及僞僭尊號封吳王後以車騎
大將軍敗桓溫於枋頭威名大震不容於嗣主暉西奔
秦苻堅堅甚重之拜冠軍將軍封賓都侯堅敗淮南入
垂軍子寶勸垂殺之垂以堅遇之厚不聽行至洛陽請
求拜墓堅許之遂起兵攻苻丕於鄴垂稱燕王置百官

年號燕元登國元年垂僭位號年建興繕宗廟社稷於
中山盡有幽冀平州之地遣使來聘三年道武遣九原
公儀使於垂垂又遣使來聘四年道武遣陳公虔使于
垂垂又遣使來聘五年又遣秦王觚使於垂垂留觚不
遣索名馬道武不與遂絕行人垂議討慕容永太史令
靳安言於垂曰彗星經尾箕之分燕當有野死之王不
出五年其國必亡歲在鶉火必尅長子垂乃止安出而
謂人曰此衆既并終不能久蓋知道武之興而不敢言

先是丁零翟遼叛垂後遣使謝罪垂不許遼怒自號大
魏天王屯滑臺與垂相擊死子釗代之及垂征剋滑臺
釗奔慕容永於長子垂議征長子諸將咸諫以永國未
有釁請待他年垂將從之垂弟司徒范陽王德固勸垂
垂曰司徒議與吾同且吾投老叩囊底智足以剋之不
復留逆賊以累子孫乃伐永克之十年垂遣其太子寶
來寇始寶之來垂已有疾自至五原道武斷其聞問迫
其從人詭告曰汝父已死何不速還寶兄弟聞之憂怖

以為信士卒駭動初寶至幽州所乘車軸無故自折占
工靳安以為大凶固勸寶還不從至是問安安曰速去
可免寶愈恐安退告人曰今將死于他鄉委骸草野為
烏鳶螻蟻所食不復見家族十月寶焚舟夜遁時河冰
未成寶謂帝不能度不設斥候十一月天暴風寒冰合
帝進軍濟河急追之至參合陂西靳安言於寶曰今日
西北風動是魏軍將至之應宜兼行速去不然必危
魏書曰寶乃使人防後因先不撫循軍無節度將士

莫為盡心行十餘里皆解鞍寢不覺大軍且近

其夜帝分部衆軍齊進東西為犄角之勢約勒士卒束馬口銜枝無聲昧爽衆軍齊進日出登山下臨其營寶衆晨將東引顧見軍至遂驚擾帝縱騎騰蹕馬皆蹶倒冰上寶及諸父兄弟單馬迸散僅以身免寶軍四五萬人一時放仗斂手就羈擒其王公文武數千垂復欲來寇太史曰太白夕沒西方數日後見東方此為躁兵先舉者亡垂不從鑿山開道至寶前敗所見積骸如丘設

祭弔之死者父兄子弟皆嗥哭聲震山川垂慙忿嘔血
發病還卒于上谷寶僭位寶字道裕垂第四子少輕果
無志操好人佞已為太子砥礪自修垂妻段氏謂垂曰
寶姿質雍容柔而不斷承平則仁明之主處雖非濟世
之雄今託以大業未見克昌之美遼西高陽兒之俊賢
者宜擇一樹之趙王麟姦詐負氣常有輕太子之心恐
難作垂不納寶聞深以為恨寶既僭位年號永康遣麟
逼其母段氏自裁段氏怒曰汝兄弟尚逼殺母安能保

社稷吾豈惜死遂自殺寶議以后謀廢嫡統無母之道
不宜成喪羣臣咸以為然寶中書令睦邃執意抗言寶
從之而止皇始元年道武南伐及克信都寶大懼夜來
犯營帝擊破之寶走中山遂奔薊寶子清河王會先守
龍城聞寶被圍率衆赴難逢寶於路寶分奪其軍以授
弟遼西王農等會怒襲農殺之勒兵攻寶寶走龍城會
追圍之侍御郎高雲襲敗會師會奔中山寶命雲為子
封夕陽公會至中山為慕容普隣所殺寶至龍城垂舅

蘭汗拒之寶南走奔薊汗復遣迎寶以汗垂之季舅子
盛又汗婿必謂無二乃還龍城汗弑之及子策等百餘
人賴子盛伺間殺汗得復國盛傳叔熙而亡

姚興字子畧後秦主苻子苻據長安稱帝國號秦苻卒
興秘之既滅秦主苻登然後發喪行服僭稱皇帝年號
皇初又改弘始道武天興元年興克洛陽以其弟東平
公紹鎮之三年興遣使來聘道武遣謁者僕射張濟使
于興

魏書曰太祖遣軍襲興高平公沒奕于奕于棄部衆
率千餘騎與赫連勃勃奔秦州追至瓦亭長安震懼
興大議為寇其臣咸以為不可興不從

天興五年夏興遣其弟義陽公平率衆四萬侵平陽攻
乾壁六十餘日陷之七月道武親征八月次永安平募
遣勇將率精騎三百闚軍為前鋒長孫肥所擒匹馬不
反平退走帝急追及柴壁圍之興悉舉其衆救平帝增
築重圍內防平出外距興入又截汾曲為南北浮橋乘

金史紀事本末卷之八十一
西岸築圍帝帥師度蒙院南四十里逆擊興興晨行北引未及安營大軍卒至興衆怖擾

魏書曰太祖詔毗陵王順以精騎衝擊獲興甲騎數百斬首千餘興退走四十餘里太祖引還平竟不敢出但使人燒圍數百步而已

帝知興氣挫乃南絕蒙院之口東杜新坂之隘守天度屯賈山令平水陸路絕將坐甲擒之又令緣汾帶岡樹柵以衛芻牧者九月興從汾西北下憑壑為壘以自固

興又將數千騎乘西橋官軍鈎取為薪蒸興還壘道武
度其必攻西圍命修整增廣之至夜興果來攻梯短不
及棄壘中而還興又分其衆臨汾為壘叩逼水門與平
相望帝因截水中興內外隔絕士衆喪氣平糧盡窘急
夜悉衆將突西南出興列兵汾西舉烽鼓譟為平接援
帝簡諸軍精銳屯汾西固守南橋絕水口興夜聞聲望
平力戰突免平聞外鼓望興攻圍引接故但叫呼虛相
應和莫敢逼圍平不得出窮逼乃將二妾赴水死興安

遠將軍不蒙世揚武將軍雷重等將士四千餘人隨平
投水帝令泅水鈎捕無免者平衆三千餘人皆斂手受
執擒興尚書右僕射狄伯支已下四十餘人興遠來救
自觀其窮舉軍悲號數日不止頻遣使請和帝不許乃
班師興還長安有雀數萬頭聞於興廟毛羽折落多有
死者月餘乃止識者曰今雀聞廟上子孫當有爭亂者
乎又興殿有聲如牛吼有二狐入長安一登興殿屋走
入宮一入市求之不得永興三年興遣周寶來聘五年

興遣使來聘并請進女明元許之神瑞元年興遣兼散
騎常侍尚書吏部郎嚴康來聘二年興遣散騎常侍東
武侯姚敞尚書姚軌奉其西平公主於明元明元以后
禮納之泰常元年興卒長子泓字元子僭位號年永和
晉將劉裕伐泓長驅入關泓戰敗請降裕執送建康斬
之

馮跋字文起小名乞直代本出長樂信都慕容永僭號
長子以跋父安為將永為垂所滅安東徙昌黎家于長

谷遂同夷俗跋飲酒至一石不亂諸弟皆不脩行業唯跋恭慎慕容熙僭號以跋為殿中左監稍遷衛中將軍後坐事逃亡既而熙政殘虐民不堪命跋乃與從兄萬泥等二十二人結謀跋與二弟乘車使婦人御潛入龍城匿於孫護之室以誅熙乃立夕陽公高雲為主雲以跋為侍中征北大將軍開府儀同三司封武邑公事皆決跋兄弟明元初雲為左右所殺跋乃自立為燕王置百官號年太平時永興元年也跋撫納契丹等諸部落

頗附之明元遣謁者于什門喻之跋留不遣太常三年
和龍城有赤氣蔽日自寅至申跋太史令張穆以為兵
氣勸跋還魏使奉修職貢

魏書載穆言曰魏威制六合而聘使隔絕違禮致忿
跋道也若大軍卒至必致吞滅宜還魏使奉修職貢
跋不從明元詔征東大將軍長孫道生攻之跋嬰城固
守道生不克而還神麌二年跋有疾其太子永先死立
次子翼為太子攝國事勒兵備非常跋娶宋氏規立其

子受居深忌翼謂之曰主上疾將瘳奈何代父臨國乎翼遂還宋氏矯絕內外遣閤人傳問翼及跋諸子大臣並不得省疾惟中給事胡福獨得出入專掌禁衛跋疾甚福慮宋氏將成其計乃言於跋弟弘勒兵入跋驚怖卒弘襲位翼勒兵出戰不利遂死跋子百餘人悉為弘殺弘字文通跋少弟跋立為尚書右僕射封中山公領中領軍內掌禁衛外總朝政歷司徒及自立與南宋通和延和元年太武親討之弘嬰城固守其營丘遼東成

周樂浪帶方玄菟六郡皆降太武徒其人三萬餘家于
幽州尚書郭深勸之歸城進女乞為附庸保守宗廟弘
曰負釁在前忿形已露附降取死不如守志更圖所適
也先是弘廢其元妻王氏黜世子崇令鎮肥如以後妻
慕容氏子王仁為世子崇母弟廣平公朗樂陵公邈相
謂曰禍將至矣遂出奔遼西勸崇來降崇納之會太武
使給事中王德陳示成敗崇遣邈入朝太武封崇遼西
王錄其國尚書事食遼西七郡承制假授文官尚書刺

史武官征鹵以下弘遣其將封羽率衆圍崇太武詔永昌王健督諸軍救之羽以九城降徙二千餘家而還弘遣其尚書高顥請罪乞以季女充掖庭太武許之徵其子王仁入朝弘不遣其散騎常侍劉訓諫

魏書載訓諫曰今雖結婚和通而未遣侍子魏若大舉將慮危亡夫以重山之險劉禪啣壁長江之難孫皓歸命令吾弱于吳蜀願時遣世子然後收離集散厚布恩澤分賑倉廩勸課農桑庶大業危而更安可

以永保社稷

弘大怒殺之太武又詔樂平王丕等討之日就蹙削上下危懼弘太常陽峴復勸弘請罪乞降令王仁入侍弘不聽乃密求迎於高麗太延二年高麗遣將葛居盧等率衆迎之弘乃擁其城內士女入于高麗先是其國有狼夜繞城羣嗥如是終歲又有鼠集于城西闕滿數里西行至水則在前者銜馬矢迭相齧尾而渡宿軍地然一旬滅觸地生蛆月餘乃止和龍城生白毛一尺二寸

弘至遼東高麗遣使勞之曰龍城王馮君爰適野次士
馬勞乎弘慙怒稱制荅讓之高麗乃處之平郭尋徒北
豐弘素侮高麗政刑賞罰猶如其國高麗乃奪其侍人
取王仁為質弘忿怒謀將南奔太武又徵弘於高麗乃
殺之北豐子孫同時死者十餘人弘子朗邈朗子熙在
外戚傳

乞伏熾盤西秦王乾歸子乾歸兄國仁始稱河南王傳
于乾歸乾歸為國仁子公府所弒熾盤討殺之自稱大

將軍河南王改年永康後襲禿髮儁檀於樂都滅之乃私署秦王置百官改年建弘後遣其尚書郎莫者胡積射將軍乞伏又寅貢金二百斤請伐赫連昌

十六國春秋載熾盤謂其羣臣曰今宋雖奄有江南夏人雄據關中皆不足與也獨魏君奕世英武士馬精強賢能為用且讖云恒代之北當有真人吾將舉國事之乃遣莫者胡等入貢

太武許之及統萬卒

十六國春秋載熾盤言曰孤知赫連氏必無成冒險歸魏今果如孤言

熾盤乃遣其叔平遠將軍泥頭弟安遠將軍安度質於京師又使其中書侍郎王愷丞相從事中郎烏訥闕奉表貢其方物熾盤卒子慕末立慕末字安石跋改年永弘其尚書隴西辛進嘗隨熾盤遊後園進彈鳥丸誤傷慕末母面至是誅進五族二十七人慕末弟殊羅蒸熾盤左夫人禿髮氏慕末知而禁之殊羅與叔父什黃謀

殺慕末使禿髮氏盜門簷簷誤門不開門者以告慕末
收其黨盡殺之欲鞭什黃什黃曰我負汝死不負汝鞭
慕末怒剗其腹投屍於河什黃母弟白養及去列頗有
怨言又殺之政刑酷濫內外崩離部人多叛後為赫連
定所逼遣王愷烏訥闕請迎于太武太武許以安定以
西平涼以東封之慕末乃焚城邑毀寶器率戶萬五千
至高田谷為赫連定所拒遂保南安太武遣師迎之慕
末衛武將軍吉毗固諫以為不宜內徙慕末從之赫連

定遣其北平公韋代率萬人攻南安城內大饑人相食
神麇四年暮末及宗族五百餘人出降送于上邽盡為
定所殺

大沮渠蒙遜本張掖臨松盧水人匈奴有左沮渠官蒙
遜之先為此職羗之酋豪曰大故以官為氏以大冠之
世居盧水為酋豪蒙遜高祖暉仲歸曾祖遮皆雄健有
勇名祖祁復延封伏地王父法弘襲爵符氏以為中田
護軍蒙遜代父領部曲有勇畧多計數頗曉天文為諸

胡所推服呂光自王於涼土使蒙遜自領營人配箱直
又以蒙遜叔父羅仇為西平太守後遣其子慕率羅仇
伐乞乾歸於枹罕為乾歸所敗殺之蒙遜求還葬羅仇
因聚衆屯金山與從兄晉昌太守男成共推建康太守
段業為使持節大都督龍驤大將軍涼州牧建康公年
稱神璽業以蒙遜為張掖太守封臨池侯男成為輔國
將軍委以軍國之任業又自稱涼王以蒙遜為尚書左
丞然忌蒙遜威名微疎遠之天興四年蒙遜內不自安

請為安西太守蒙遜欲激怒其衆乃密誣告男成叛逆業殺之蒙遜泣而告衆陳欲復讐之意男成素有恩信衆情怨憤皆涕泣從之蒙遜因舉兵攻殺業私署使持節大都督大將軍涼州牧張掖公年號永安居張掖是月西涼李嵩亦起兵年號庚子永興中蒙遜剋姑臧遷居之改號玄始自稱河西王置百官頻遣使朝貢蒙遜寢於新臺閣人王懷祖斫蒙遜傷足蒙遜妻孟氏擒懷祖斬之及聞晉滅秦姚泓怒甚有校郎言事於蒙遜蒙

遜曰汝聞劉裕入關敢研研然也遂殺之尋稱藩于晉
泰常中蒙遜克燉煌改年承玄後又稱藩于宋并求書
宋文帝並給之

南宋書曰蒙遜世子興國遣使奉表請周易及子集
諸書並賜之

蒙遜又就宋司徒王弘求搜神記弘與之神麈中遣尚
書郎宗舒左常侍高猛朝貢上表稱臣

魏書載表曰伏惟陛下天縱睿聖鍾運多艱九服紛

擾車書未同上靈降祐祚歸有道純風一鼓殊方革
而臣自欣投老得覩盛化冀終餘年憑倚皇極前後
奉表貢使相望去者杳然寂無旋返未審津途寇險
竟不仰達為天朝高遠未蒙齒錄屏營戰灼無地自
措往年侍郎郭祇等還奉被詔書三接之恩始隆萬
里之心有賴誘勸既加引納彌篤然商胡後至奉公
卿書援引歷數安危之機厲以竇融知命之美顧惟
情願實深悚惕何者臣不自揆遠託大蔭若萬國來

庭百辟陞賀高蹈先至之端獨步知機之首但世難
尚殷情願未遂章表頻修滯懷不暢許身於國款誠
莫表致惑羣后貽慮公卿不在同獎之例未達拱辰
之心延首一隅低回四極臣厯觀符瑞候察天時未
有過於皇魏踰於陛下加以靈啟聖姿幼登天位方
將振神綱以掩六合洒玄澤以潤八荒况在秦隴茶
炭之餘直是老臣盡效之會

前後貢使相望後遣子安周内侍太武遣兼太常李順

持節拜蒙遜為假節加侍中都督涼州西域羗戎諸軍
事太傅行征西大將軍涼州牧涼王使崔浩為冊書褒
賞之

魏書載冊曰昔我皇祖胄自黃軒疊曜重光不殞其
舊逮於太祖應期協運大業惟新奄有區宇受命作
魏降及太宗廣闡崇基政和民阜朕承天緒思廓宇
縣然時運或否霽霧四張赫連跋扈於關西大檀陸
梁於漠北戎夷負阻江淮未賓是用自東徂西戎軒

屢駕賴宗廟靈長將士宣力克翦兇渠震服強獷四方漸泰表裏無塵王先識機運經畧深遠與朕協同厥功洪茂當今運鍾時季僭逆憑陵有土者莫不跨峙一隅有民者莫不榮其私號不遵衆星拱極之道不慕細流歸海之義而王深悟大體率由典章任土貢珍愛子入侍勲義著焉道業存焉惟王乃祖乃父有土有民論功德則無二於當時言氏族則始因於世爵古先帝王褒賢賞德莫不胙土分民建為藩輔

是以周成命太公以表東海襄王錫晉文大啟南陽
是用割涼州之武威張掖敦煌酒泉西海金城西平
七郡封王為涼王王受茲素土苴以白茅用建家社
為魏藩輔盛衰存亡與魏升降夫功高則爵尊德厚
則任重又加命王入贊百揆謀謨幃幄出征不懷登
攝侯伯其以太傅行征西大將軍仗鉞秉旄鷹揚河
右遠祛王畧懷柔荒隅北盡窮髮南極庸岷西被崑
嶺東至河曲王實征之以夾輔皇室又命王建國畧

將相羣卿百官承制假授除文官刺史以還武官撫
軍以下建天子旌旗出入警蹕如漢初諸侯王故事
欽哉惟時往踐乃職祗服朕命協亮天工俾九德咸
叙無忝庶官用終爾顯德對揚我皇祖之休烈

蒙遜又改義和元年延和二年四月蒙遜卒詔遣使監
護喪事私謚武宣王蒙遜性淫忌忍于刑戮閭庭中畧
無風禮第三子牧犍

南宋書作茂虔

統任自稱河西王遣使請朝命并遣使通宋受宋褒授
南宋書載元嘉十一年茂虔表曰臣聞功以濟物為
高非竹帛無以述德名以當實為美非諡號無以休
終先臣蒙遊西復涼城芟夷羣暴情灑區夏暨運鍾
有道備大宋之宗臣爵班九伏享惟丕之永祚功名
昭著克固貞節考終由正請名之路無階懿迹雖弘
述叙之美有缺臣子痛感咸用不安謹按謚法克定
禍亂曰武善聞周達曰宣先臣廓清河外勲光天府

標榜稱述實兼斯義輒上謚曰武宣王若允天聽垂
之史筆則幽顯荷榮始終無恨文帝優詔答之即授
持節散騎常侍都督涼秦河沙四州諸軍事征西大
將軍領護中郎將西夷校尉涼州刺史河西王十四
年奉表獻方物并獻周生子十三卷時務論十二卷
三國總畧二十卷俗問十一卷十三州志十卷文檢
六卷四科傳四卷燉煌實錄十卷涼書十卷漢皇德
傳二十五卷亡典七卷魏駁九卷謝艾集八卷古今

字二卷乘丘先生三卷周髀一卷皇帝玉曆三合記一卷趙歐傳并甲寅元曆一卷孔子贊一卷合一百五十四卷又求晉趙起居注諸雜書數十件皆賜之愚每嘆魏孝靜以好文學亡國不知有先之者即魏滅之沮渠牧犍是

先是太武遣李順迎蒙遜女為夫人會蒙遜卒牧犍述蒙遜遺意送妹於京師拜右昭儀改稱承和元年太武又遣李順拜牧犍為使持節侍中都督涼沙河三州西

域羗戎諸軍事車騎將軍開府儀同三司領護西戎校尉涼州刺史河西王牧犍以無功受賞乃留順表乞安平一號優詔不許牧犍尚太武妹武威公主遣其相宋繇表謝獻馬五百匹黃金百斤繇又表請公主及牧犍母妃后定號朝議謂禮母以子貴妻從夫爵牧犍母宜稱河西國太后公主于國內稱王后于京師稱公主詔從之牧犍遣建節將軍沮渠旁周朝京師太武遣侍中古弼尚書李順賜其侍臣衣服有差并徵世子封壇入

侍牧犍乃遣封壇朝京師太延五年太武遣尚書賀羅使涼州且觀虛實帝以牧犍雖稱藩致貢內多垂悖親征之詔公卿為書讓之數其罪十二

魏書載書曰王外從正朔內不捨僭罪一也民籍地圖不登公府任土作貢不入司農罪二也既荷王爵又受偽官取兩端之榮邀不二之寵罪三也知朝廷志在懷遠固違聖畧初稅商胡以斷行旅罪四也揚言西戎高自驕大罪五也坐自封殖不欲入朝罪六

也北託叛鹵南引仇池憑陵谷軍提挈為姦罪七也
承勅過限輒假征鎮罪八也欣敵之全幸我之敗侮
慢王人供不以禮罪九也既婚帝室寵踰功舊方恣
慾情蒸淫其嫂罪十也既違伉儷之體不篤婚姻之
義公行酖毒規害公主罪十一也備防王人候守闈
要有如寇仇罪十二也先令後誅王者之典若親率
羣臣委贄郊迎謁拜馬首上策也六軍既臨面縛與
櫬其次也如其守迷窮城不時悛悟身死族滅為世

大戮宜思厥中自求多福

官軍濟河牧捷曰何故爾也用其左丞姚定國計不肯
出迎求救柔然遣大將董來萬餘人拒軍城南敗退駕
至姑臧遣使喻牧捷令出牧捷聞柔然內侵善無幸駕
返旆遂嬰城自守牧捷兄子祖踰城出降具知其情太
武引諸軍進攻牧捷兄子萬年率麾下又來降城拔牧
捷與左右文武面縛請罪詔釋其縛徙涼州人三萬餘
家于京師

魏書食貨志曰世祖平牧犍見河西水草善乃以為
牧地畜產孳息馬至二百餘萬匹橐駝將半之牛羊
無數高祖即位後復以河陽為牧場恒置戎馬十餘
萬匹以擬京師軍警之備每年自河西徙牧并州以
漸南轉欲其習水土而無死傷而河西之牧彌滋正
光後喪亂遂為羣寇盜掠

初太延中有一老父投書于燉煌城東門忽不見其書
紙八字文曰涼王三十年若七年又於電震所得石丹



書曰河西河西三十年破帶石樂七年帶石山名在姑臧南山祀傍泥陷不通牧捷征南大將軍董來曰祀豈有知乎遂毀祀伐木通道而行牧捷立果七年滅初牧捷淫嫂李氏兄弟三人傳嬖之李氏與牧捷姊共毒公主太武遺醫乘傳救主得愈帝徵李氏牧捷不遣厚送居于酒泉帝大怒既克猶以妹婿待之其母死以王太妃禮葬又為蒙遜置守冢三十家授牧捷征西大將軍王如故初官軍未入牧捷使人斫開府庫取金銀珠玉

及珍奇器物不更封閉民因入盜巨細蕩盡有司求賊
不得真君八年其所親人及守藏者告之乃窮究其事
搜其家悉得所藏器物又告牧犍父子多畜毒藥前後
隱竊殺人乃有百數姊妹皆為左道朋行淫佚曾無愧
顏始罽賓沙門曇無讖東入鄯善自云能使鬼療病令
婦人多子與鄯善王妹曼頭陀林淫通發覺亡奔涼州
蒙遜寵之號為聖人曇無讖以男女交接術教授婦女
蒙遜諸女子婦皆往授法太武聞諸行人言曇無讖術

賜昭儀沮渠氏死誅其宗族惟萬年及祖以前降得免
是年又有人告牧犍猶與故臣交通謀反詔司徒崔浩
就公主第賜牧犍死與主決良久乃自裁葬以王禮謚
哀王及主薨詔與牧犍合葬

據本史李惠傳公主曾改適惠父蓋何顏與牧犍合
葬

公主無男有女以國甥得襲母爵武威公主蒙遜子秉

字季義位東雍州刺史真君中與河東薛安都謀逆召
至京付其兄弟扼殺之萬年祖並以先降萬年拜張掖
王祖廣武公後坐謀逆俱死初牧犍之敗弟樂都太守
安周南奔吐谷渾太武遣鎮南將軍奚眷討之牧犍弟
酒泉太守無諱奔晉昌乃使弋陽公潔守酒泉真君初
無諱圍酒泉陷之又圍張掖不能克退保臨松太武詔
諭之時永昌王犍鎮涼州無諱使其弟尉梁偉詣犍求
奉酒泉又送潔及統帥兵士于犍軍二年太武遣使拜

無諱為征西大將軍涼州牧酒泉王尋以無諱復規叛遣南陽王奚眷討酒泉剋之無諱遂謀渡流沙遣安周西擊鄯善欲降會魏使者勸令拒守安周不能克退保東城三年春鄯善王比龍西奔且末其世子乃從安周鄯善大亂無諱遂渡流沙士卒渴死者大半仍據鄯善先是高昌太守闕爽為李寶舅唐契所攻聞無諱至鄯善遣使詐降欲令無諱與唐契相擊無諱留安周住鄯善從焉者東北趣高昌會柔然殺唐契爽拒無諱將衛興

奴遂屠其城棄奔柔然無諱因留高昌

南宋書曰無諱據高昌遣常侍汎偁奉表獻方物太祖詔曰往年猾鹵縱逸侵害涼土西河王茂虔遂至不守淪陷鹵庭累世著誠以為矜悼次第無諱克紹遺業保據方隅係心闕廷踐修貢職宜加朝命以褒篤勲可持節散騎常侍都督涼河沙三州諸軍事征西大將軍領護中郎將西夷校尉涼州刺史河西王五年夏無諱病卒安周立

欽定四庫全書

卷一百八十三

南宋書曰二十一年復授安周如父官世祖大明三年安周奉獻方物

為彙然所并

愚按北史刪去劉淵石勒等傳與魏無涉者甚當今

所有前燕慕容廆暉後燕慕容盛熙雲

西燕慕容泓冲南燕慕容德超後秦姚萇西秦乞伏國

仁乾歸皆與魏無涉且已詳晉書而為北史所未

者今皆削之從實且去贅也

南北史合注

十四

南北史合注卷一百八十三